

1. KUHUSU SWALAATU RAGHAAIB:

Tumetangulia kutaja kauli za baadhi ya wanachuoni kwamba hakuna hadithi sahihi inayofaa kutolea hoja inayoelezea fadhila maalumu za mwezi wa rajab, si kufunga wala kuswali katika usiku fulani ndani yake, ama kauli inayosema:

“Mwenye kufunga siku ya Al-khamis au Al-khamis ya mwanzo katika mwezi wa rajab kisha akaswali rakaa kumi na mbili baina ya maghrib na ishaa, akasoma katika kila rakaa surat Al-Faatiha, na surat Al-Qadri mara tatu na surat Ikhlaas mara kumi na mbili, kisha atatoa salamu kila baada ya rakaa mbili, kisha atamswalia Mtume mara sabini”.

Amesema Imam Nnawawi -Allaah amrehemu- kuhusiana na swala hiyo: **“Swala hii hajawahi kuiswali Mtume wala yeyote katika Maswahaba, wala Maimamu wanne, nayo ni bidaa mbaya yenye kuchukiwa sana, na imekusanya mambo mengi ya munkar (mabaya), na maulamaa wengi wameandika vitabu vingi katika kuipinga kwake na kuisema vibaya”⁽¹⁾.**

Na amesema Ibn Hajar -Allaah amrehemu- **“Hadithi zote zinazoelezea swala ya Raghaaib ni Maudhuu’a (uwongo)⁽²⁾, wala haifai kuzifanyia kazi”⁽³⁾.**

Amesema Ibnu Taymiyyah -Allaah amrehemu-: **“Kuanzisha swala kwa idadi (ya rakaa) maalumu, kusoma sura maalumu, katika wakati maalumu na kuswaliwa kwa jamaa, kama vile Swalat Raghaaib (inayoswaliwa) mwanzo wa mwezi wa rajab au katikati ya mwezi wa sha’baani na usiku wa tarehe ishirini**

¹- Tazama kitabu: [Al-Majmuu] (Jz. 4, Uk. 56).

²- Hadithi Maudhui ni maneno yaliyotungwa na kunasibishwa kwa Mtume -swala na salamu zimshukie-, walikuwepo watu ambao wakifanya hivyo makusudi, ima kwa maslahi binafsi kama vile kupata fedha na umaarufu, au ni Wazandiki waliongia katika Uislamu ili kuubomoa kwa ndani.

³-Tazama kitabu: [Tabyiinul ‘Ajab]:

na saba katika mwezi wa Rajab, na mfano wa hayo, jambo hilo halipo katika sheria kwa makubaliano ya Maimamu wote wa kiislamu”(4).

Na sehemu nyingine amesema: “Swalatu Rraghaaib haina asili yoyote bali ni uzushi wala haipendekezwi kuiswali kwa jamaa wala peke yake”(5).

Na amesema Ibnul Qayyim -Allaah amrehemu-: “Hadithi zote zinazoelezea kuhusiana na Swalaatu Rraghaaib ni za uwongo amezuliwa Mtume -swala na salamu zimshukie-”(6).

2. KUHUSU KUFUNGA KATIKA MWEZI WA RAJAB:

Amesema Ibnul Qayyim -Allaah amrehemu-: “Mtume -swala na salamu zimshukie- hajawahi kufunga miezi mitatu mfululizo, kama wanavyofanya hilo baadhi ya watu(7), wala hajawahi kufunga mwezi wa rajab kabisa, wala hajapendekaza kufungwa kwake (mwezi huo)”(8).

Amepokea Ibn Abi Shaiba -Allaah amrehemu-, kutoka kwa Kharsha Ibnul Hurri amesema: “Nilimuona Umar -Allaah amridhie- anaipiga mikono ya watu katika mwezi wa rajab ili waiweke kwenye sahani (ya chakula), hali ya kuwa anasema: ‘Kuleni hakika huo ni mwezi ambao walikuwa wakiuadhimisha watu wa Jaahiliyyah (kabla ya kuja Uislamu)”(9).

Amesema sheikh Albani -Allaah amrehemu- “Hii ni sanadi sahihi”(10).

⁴- Tazama kitabu: [Al-Fatawa], (Jz. 2, Uk. 2) na (Jz. 1, Uk. 149) na (Jz. 23, Uk. 134)].

⁵- Tazama kitabu: [Al-Fatawa] (Jz. 23, Uk. 132).

⁶- Tazama kitabu: [Al-Manaarul Muniif] (Uk. 59).

⁷- Kuna watu wanafunga miezi mitatu mfalulizo, Rajab, Sha'bani na Ramadhani, na hali ya kuwa Mtume -swala na salamu zimshukie- hakufanya hivyo wala hakufundisha.

⁸- Tazama kitabu: [Zaadul Ma'ad] (Jz. 2, Uk. 64).

⁹- Tazama kitabu: [Al-Muswannaf] (Jz. 3, Uk. 102).

¹⁰- Tazama kitabu: [Al-Irwaa] hadithi namba (957).

Na pia Abu Shaama -Allaah amrehemu- ametaja: “kwamba sheikh wa Khurasaan Imam Abdullaahi Al-Answaari hafungi katika mwezi wa rajab na amekataza hilo kwa kusema: (Haijathibiti kutoka kwa Mtume -swala na salamu zimshukie- kuhusu fadhila za mwezi wa rajab wala kufunga kwake”⁽¹¹⁾.

Amesema Imam Turtuush -Allaah amrehemu- (amefariki mwaka (520H):

“Ni karaha kufunga mwezi wa rajab kwa aina tatu:

- i. Kuhusisha kwao waislamu kuufunga (mwezi huo) kila mwaka.
- ii. Au (kuitakidi kwao) kwamba jambo hilo ni sunnah iliyothibiti kwa Mtume -swala na salamu zimshukie- kama vile (swala za) sunnah za ratiba⁽¹²⁾.
- iii. Au (kuamini) kwamba kufunga katika mwezi huo kuna thawabu nyingi kuliko miezi mingine kama vile funga ya mwezi wa ‘Aashuraa”⁽¹³⁾.

وَصَلَّى اللَّهُ وَسَلَّمْ عَلَى نَبِيِّنَا مُحَمَّدٍ وَآلِهِ وَصَحْبِهِ أَجْمَعِينَ

2/rajab/1444M – 24/1/2023H
Tanzania.

¹¹- Tazama kitabu: [Al-Baa’ith] (Uk. 71)

¹²- Sunna za ratiba (Sunanu Rrawaatib) ni rakaa 12 au 10: [Rakaa 4 au 2 kabla ya Adhuhuri na rakaa 2 baada yake, Rakaa 2 baada ya Maghrib, Rakaa 2 baada ya Ishaa na Rakaa 2 kabla ya Alfajri].

¹³- Tazama kitabu: [Al-Bidaa’ Wal-Hawaadith] (Uk. 130).